

Na kuću Delića ponovo bačena bomba: "Hvala Bogu, djeca su spavala kod bake"

1. kolovoza 2017.



Nakon što je u aprilu pod okriljem noći bačena eksplozivna naprava ispred kuće u vlasništvu bračnog para Delić na adresi Donja Jasenica, noćas je ponovljen scenarij.

U prošloj eksploziji na kući je nastala manja materijalna šteta, došlo je do pucanja stakla i oštećenja pročelja, ali nova eksplozija je napravila znatno veću štetu, te unijela veći strah i nemir među ukućanima.

Ekipa Faktora pred kućom zatekla je Gordanu Delić, majku Darija Delića, čija kuća je tek nakon što je popravljena od prošlog napada ponovo oštećena.

No, Gordana zahvaljuje Bogu jer unučad nisu spavala kod kuće već kod nevjestine majke, te što u kući nije bilo nikoga jer je sin na putu.

Priča nam kako ju je nešto prije četiri sata ujutro probudila snažna detonacija. Kada je izašla napolje i našla se pred sinovom kućom koja je udaljena samo nekoliko kuća od njene, doživjela je šok.

– Nisam vidjela ništa sumnjivo u blizini, ni auto niti bilo kakvu osobu, kao ni prošli put. Moj sin je i prošli put kazao kako nije u zavadi s bilo kim. Sa svima se fino pazimo, živimo svoj život. Da li postoje neke skrivene namjere koje bi dovele do ovoga, stvarno ne znam. Još nismo dobili povratne informacije od policije za prošlu eksploziju, uzeli su tragove i nisu nam više ništa javljali – ističe Gordana.

Kaže kako očito neko dobro zna kretanje njenog sina Darija, jer je i prošli put bio na putu kao i sada. Dario vozi kamion za firmu "Autoprevoz".

Mještani o porodici Delić govore samo najbolje, te da su mirne i poželjne komšije. Komšija Ivo, kojega smo zatekli pred kućom, vidno je zabrinut za sudbinu Delića. Ni on sam ne zna koji bi mogao biti razlog za nešto ovako. Ističe kako bi policija trebala ozbiljno da se pozabavi ovim slučajem i pronađe počinioca.

Prilikom eksplozije, za sada nepoznate eksplozivne naprave, došlo je do oštećenja garažnih vrata, stakala na poslovnom prostoru i stambenom dijelu kuće Delića i manja materijalna šteta na kući prekoputa. Šteta je nekoliko hiljada maraka.

Mostarska policija jutros je obavila uviđaj na mjestu događaja, a istraga je u toku.